

夏口縣志

李昌譽  
署籤



地260.19  
41  
部=17



15-16卷

1-35-33頁



人物志三

夏口縣志卷十五

耆德附壽民

方技 流寓 方外

耆德附

明

胡遵義熊士章江油然傳

胡遵義天啓元年知府周三錫以城無內附乃伐禹梁山之石周砌障牆遵義捐資督功頗著勞績

熊士章字文麓其先進賢人隨父任楚府典寶遂家漢陽補庠生與江夏郭正域任家相交最篤樂善不倦日坐市門見人有饑寒狀輒捐金與之即偽亦弗問年八十七卒

江油然字元白弱冠補弟子員狀貌魁梧多膂力喜談方略諸兵事崇正中寇氛日熾油然結鄉勇為捍禦計適左帥部下惠登相有潰卒由豫將入境焚掠甚慘然率數百人相持於後襄河凡六七日卒度不能入從他道去事平撫按嘉其功欲改授武階辭不就踰年卒

志

人物志三

一

熊士奇廖應魁劉寶傳

熊士奇性慷慨不吝施與貧者貸無以償或質子女田宅輒為之焚券曰無以小利折而骨月奪而居食孫徵泰舉人

廖應魁混跡市廛留心詩史王府爭漢口地稞甚橫應魁挺身以辯至受拷掠終不肯誣服一辭人稱其勁正焉

劉寶慷慨有志節弟賓及宰皆文學知名勸應試寶見時衰不樂仕進修偉美髯勇力過人時本鄉盜賊公行有羣盜夜劫鄰家寶徒手舞大車盡殺之為人捍災禦患事多類此

張士彥吳有成傳

張士彥字恢浩性孝友置義田延塾師以仁其族明末驛苦兵擾  
彥鬻產置馬應之流寇起修水陸二砦俾鄉村得保妻孥以子三  
異貴贈中憲大夫

吳有成字大初其先新安人父仲依外氏遂占籍漢陽有成天性  
孝友瞻族睦鄰多隱德萬曆間中官陳奉督楚礦稅急有成寓書  
其幕客多所保全康熙中從祀鄉賢

清

劉 復林士秀張 鵬傳

劉 復字式南康熙時人郡庠生事親孝而能敬每請業必拜弟  
某篤病助之療治脫妻簪珥以償藥貲與弟拱以祖宅義讓孤姪  
性廉介道遇遺金不拾訪其人還之長子良瑞字輯五仁厚友讓  
臨終囑子弟曰人當使人愛我勿令人畏我積學以布衣終因曾

志

人物志三

二

孫傳曾貴贈中議大夫季弟良輿乾隆甲午舉人

林士秀字賢採雍正時人幼失怙家貧甚兼母多病能曲盡孝養  
事從祖父母養葬無虧捐賑饑寒排解爭忿從善嫉惡鄉里賢之  
嘉慶十四年呈請學憲施以老成典型匾額旌之子四孫春煦邑  
庠生

張 鵬字國翼少孤棄儒就質孝養孀母慈善濟人晚年入國學  
永訣時囑子孫曰居官無論久暫心宜如白日青天處境無論安  
危志宜如銅牆鐵壁已富已貴之後無賢嗣不可聯姻寡婦閨女  
之家雖至親不宜長往生平代人婚嫁救人水火不勝記憶汝曹  
勉之囑畢而逝時年七十有六子椿歲貢生候選訓導孫保和廩  
生候選訓導

馮 燮傳

馮燮字巨卿嗜學自立課程寒暑無間每雞鳴起篝燈對卷或止之曰屢試屢蹶是不可以已乎燮曰吾非徒以是讀書平旦之氣不可失也且一日不讀則此心無所著時人謂爲至理名言然卒不遇齋志以沒

### 葉廷芳傳

葉廷芳派名成住字客堯號松亭溧水庠生援例候選道以受分產業遂著籍漢陽性孝友書必觀孔孟學必守朱程不規規講說外自表襮而恒以躬修實踐刻勵於衾影雖燕居正衣冠無懈容有弟三人析產後皆中落復與合爨同居每歲季冬念貧民無以卒歲懷碎金百數十封徧行閭巷俵散之不告姓名盡一月乃止歲以爲常喜吟咏著有花餘亭詩存孝感胡侍御紹鼎工詩及書與論交最篤每作書喜錄廷芳詩其傾倒若此則廷芳之詩夷猶

志

人物志三

三

恬曠風味可想矣江漢間至今猶有藏侍御書爲兩家韻事者卒年五十有四子繼雯見儒林以曾孫名琛貴晉贈兩廣總督光祿大夫建威將軍

### 盧先爵徐鳳翽劉代傳傳

盧先爵太學生性純謹慷慨好施或貸錢屆期不償弗索也爲子擇師誠而且敬子振新辛未進士任廣西令

徐鳳翽性好善樂施予每歲暮竭力助貧乏者或昏夜袖銀封暗投人家漢鎮八角亭義塚首施山地而不居其名年八十卒孫應標補茂才

劉代傳字紹宗植品端正慷慨好義幼孤克自樹立家中落隱於賈鄉曲有難處事輒排難解紛無不帖服喜賓客過從者座常滿里黨中待以舉火者甚夥議叙從九未仕卒妻顧氏守節三十餘

年子家瑛邑庠生孫銘本進士鍊本庠生鎮本六品銜

胡元傳

胡元字善培客漢皋好善不倦嘗糾同志創立敦本同善兩堂救生卹死惠及存歿值經費不支則傾家貲以協濟之遇邑中大災祲勸辦賑務必求踐實事焉道光庚子年督修永豐隄聞慨然獨肩其任宿工次年餘不避勞怨事歲尚絀數千金稱貸以足之不重募也嗣復培修江隄以固外內至今居民猶立私祠以尸祝之

姚尙文傳

姚尙文字厚菴先世江西南康州學正名正乙者始遷楚居孝昌尙文復自孝昌遷漢幼嗜學究心性理居家以禮法自守屢困於有司乃於漢上築室以養親服田力穡種竹開池意致澹如性至

志

人物志三

四

孝父卒母茹素終身疾革時尚文進甘旨跪三日勸母加餐母曰吾固知爾孝心然無以姑息爲也尙文伏地大痛不能起聞者悲之居平正襟危坐讀誦不輟雖屢空晏如也撫諸弟嚴而有恩置祭田以贍貧族嘗館某鉅公家欲薦之內自計曰以此進願能行我志乎遂託故以去

朱瀚傳

朱瀚端方樂善乾隆戊戌乙巳施食以拯貧民備棺木以恤暴露自丙午至庚戌漢鎮屢患水災瀚設竹籓木舫義渡船以濟行人又修各處橋梁及五顯廟馬頭正街河街二道暨府縣學宮祠宇尊經閣之就圯者誠院考棚棹凳號舍亦籌備完善前後共捐銀一萬六千六百餘兩大吏以聞予議叙子正紀任戶部司務正紳教諭正繩業儒皆能繼父志遠近咸稱之

林方顯傳

林方顯字晦菴乾隆時人強毅有爲以文受知入武庠樂施與好義舉修祠宇置祭田重老成尊師儒見里中爭鬪者攜其人至家正容莊論以排解之無不首肯心服次日具酒食婉和之由是里中爭者悉化其未化者恒恐爲顯所知令人敬畏如此卒年八十一歲眼觀四代子四長子年九十次子年八十一三子年八十五四子年八十二可謂人瑞其孫與曾孫約三十餘人皆顯忠厚所留貽也

劉光傳

劉光字國賓乾隆時人良瑞季子敦孝友嘗析家貲讓其半於伯兄曰伯兄起家吾義不敢均分與人坦易無私視鄉族欣戚不啻在己見後輩賢能者獎勵之族有橫逆至者人謂曷杖擊之光

志

人物志三

五

曰我與若祖上骨肉至親忍與若較曲直乎其物我無間類如此入武庠恥赴武闈終身課讀不倦嘗慕范文正公願爲良醫語以醫藥活人數十年未嘗受謝曰吾濟人苦衷子孫必有食其報者以孫傳曾貴贈中議大夫

呂伯麟傳

呂伯麟號鳳池一號雲間邑廩生道光丁酉歲貢候選訓導精制藝爲文冲遠動與古會屢困棘闈屢膺房薦不售生平以授徒爲業教授諸子多知名士有不能讀者不計束修成就者甚眾陂邑蕭公良城任湖南學政聘麟閱卷考長沙郡以猶欲其入命題極精細風簷中無佳作蕭公請麟作文以示諸生揮毫立就皆大嘆服麟性孝友事繼母盡職人無間言嘗謂人日記言事父母下氣怡聲吾輩讀書非鄉愚比但少失怡柔卽與嗔斥父母何異鄉里

嘆爲至言卒年七十有三

劉方行傳

劉方行字健齋父良琨早卒母程茹苦積勞兩目昏眊方行就養無方有需立應母自忘其爲無目人也至年九十六乃終宗族謂爲方行純孝所致云性嚴正不苟言笑庭內肅然里有忿鬪聞方行輒解不肖者至恐爲方行所知屢試必登前列肄業晴川文藝爲同舍推重晚而學益邃著達成堂稿四卷正體詩譜六卷行世嘉慶初元以孝廉方正應舉學使吳暄額品重儒林獎之

蘇見龍傳

蘇見龍樂善好義水漲有節婦墳數處爲水所囓力爲捍禦培修捐資收暴骨掩露骸凡數千百塚歷年不倦嘉慶五年漢上四郡大水民流至者數萬漢鎮游民不得食者亦數萬十二月米驟貴

志

人物志三

六

道瑾相望饑民恃眾強借十八日圍西門譚姓竟日不散縣令遣尉劉宣勢驅之不應太守劉斌召見龍往說之乃聽約見龍奔馳凡十七日說紳商巨賈共籌資以賑之有汪秉衡者倡議以萬金爲開賑之用磋商亦捐金十萬爲平糶費徐賡載觀察子姪亦捐銀四千兩於是開廠煮粥以賑之民情帖然待麥熟授糧而歸全活者凡十餘萬人遠近德之年八十一卒子四人四子世興亦好義戊午武舉

劉傳燧傳

劉傳燧字子佩號左甫邑庠生幼孝友事父母服勞承志長治家事力任其難季弟補官迎兩親就養都下傳燧侍之以行在道調護尤謹歸赴鄉試畢聞季弟病馳往視之走數千里忘其勞季弟疾劇假歸遂不起哭之哀季弟無子以子世圭後之殤又以子世





諸人束手長庚毅然捐貲八百金工遂成張司馬額其堂眾善獨肩乙已蠲賑太守尹錫以好善樂施額

徐 鎬傳

徐 鎬字以忠事親以孝聞性好義凡修橋梁置義學施棺捨藥利濟於人之事無不踴躍奮往庚申歲被倡議捐賑全活者以萬計甲戌饑亦如之邑中文風日盛學額過隘鎬創議請廣額倡其事者豐承迨陳士鳳孫廷士汪廉姚光海蕭卓銘袁應惇楊鳴鶴楊維謐盧振新蔣義彬柏中照程秉左承禮陳恕雷聯奎李登書李本忠李炳忠凡十九人荷兩院奏准廣額三名士風丕振子步青庠生仰承親意捐江漢晴川兩書院膏火千金焉

林志侗林志旦傳

林志侗乾隆時人品端行方推爲一族長鋤強植弱敬宗收族族有舟子橫甚一日有孀婦負米渡湖爲舟子所窘侗聞之馳往捽舟子面婦旣渡責舟子負米膝行送抵婦家爲學甚刻苦年四十二遇卽輟志名場父母年踰大耋色養無少懈修譜牒立祠規置祭產族之人倚賴焉卒年六十七歲

林志旦字維東刻苦攻讀不售撫五歲孤姪至於成立因族祠譜牒皆燬倡義鳩宗人修纂每歲暮族戚之親而貧疏而賢者皆有分潤雍正時邑宰閻公賑資本鄉聘請董其事惠溥民利閻公喜曰英識老成眞幹才也年六十八卒

丁仁靜傳

丁仁靜號震齋先世籍浙江上虞祖若父行賈漢臯遂著籍漢陽少敏慧年十三則經史文選已博涉矣十四補弟子員名列第一旋食餼益修學不倦家素饒析產後與仲兄同居已財逾萬金付

仲兄司之出納俄而折閱仲欲盡以己所有償之仁靜堅不可一  
旦爲寔人殊夷然也乾隆壬子鄉闈已擬元矣復見遺以明經充  
貢就訓導職恒事幕遊客黃州觀察介岩吳公所爲所重課其子  
苾者十年後入詞垣官至閣學多見峯觀察在漢陽亦羅致之課  
其次子詩樵後亦成進士官比部皆曰不敢忘震齋先生師資之  
益遊記室久牋牘出傳誦殆徧晚乃家居訓宗族睦鄉里闕空乏  
生平未道人短當途遇詬訐者將見犯絕不與校其人徐覺誤也  
逡巡遁但微笑而已四十後悼亡不再娶習達摩易筋經有驗年  
七十有九如健少年是年自元旦始每晝夜閱書必盡數卷至八  
月家藏卷軸悉覽一過忽稱不快翌日遂卒以孫鹿鳴貴貤贈承  
德郎戶部河南司主事覃恩晉贈奉直大夫

劉正性傳

志

人物志三

九

劉正性字成之以諸生山斗一鄉制藝不落時蹊書法尤極適宕  
侍母疾兩月不解帶事繼妣養葬無違禮父敬年逾八旬性依膝  
下如孺子生平操守甚嚴不苟取與辛卯大歉有以數萬金託賑  
貧乏者不矜功利不避勞怨活萬餘人凡事關宗族梓里當爲者無  
不毅然爲之年八十三卒子二次子傳宣邑庠生孫登鰲郡庠生

丁耀南傳

丁耀南字心臣少隨父仁靜讀書黃州觀察署中與吳子苾方伯  
共研者十年旣補弟子員秋闈屢薦未售家貧恒藉筆耕奉親在  
賓館皆爲居停引重如宮保裕公中丞温公尤以鍼芥相契者也  
性至孝生則致養死則致哀嘗謁母墓見蟻自墓出卽痛哭取蟻  
吞之乃擇地遷焉篤念本支敦睦尤至其爲人極誠無僞戚黨交  
遊推肝鬲相與大抵盛德足爲楷模云家訓悉以義方子鹿鳴官

農曹貽書惟勗以上不負國下不負民中不負身咸豐時粵賊陷沔鄂避居蔡甸疾作嘆曰五倫五事今更覺躬行未逮也遂卒以子鹿鳴貴晉封奉直大夫戶部河南司主事

傅 敏左承禮傳

傅 敏字公甫與堂弟傅沛霖等立自新堂好施不倦道光戊申已酉水災設義渡一百餘隻遷居民於高阜嗣以歲饑棄子女者絡繹於途創立恤孤局以收養之歷年餘各訪其家以歸又訪青年苦節婦多無依倚者月給錢文以賙恤之人稱善舉焉

左承禮字蘋江道光癸巳歲貢生敦孝友一堂和順雖兄弟異居而有無緩急罄囊不恤也屢膺鶚薦不售授徒自給不計修脯於貧苦者尤加意提撕其門下士多顯達者性耿介不妄取與不苟言笑樂推解力所弗瞻竭心力以求濟嘗館鄴承迨家嘉慶二十

志

人物志三

十

年以合邑學額太隘承迨毅然率同志倡請加額又增置晴川書院膏火皆禮匡助而成士林稱碩望焉年六十一卒

姚 珣傳

姚 珣字琢菴邑廩生工制藝詩古文歲科試輒冠軍鄉試數膺鶚薦不售性耿介不苟取與尤慎交遊惟授徒自給門下多知名士年五十二卒子維臣邑庠生孫灝儒訓導

焦惠恬馮錫珪袁勳臣傳

焦惠恬字心孚清癯骨立若不勝衣爲文有奇氣書追晉魏試郡邑有聲不售卽絕意進取隱居事親課子以經史自娛慕胡昭任安之爲人怡情山水以布衣終子鴻廩貢生

馮錫珪更名鑑新字德夫邑庠生問學宏博尤留心體國經野之書銳然有用世志困諸生無所試以著述自娛性方正過里門五

尺之童皆起敬鄉人有桀鷙者見錫珪皆改貌斂容不敢肆所爲不善唯恐錫珪知之時人比爲太原王彥方云

袁勳臣字寅陔邑庠生性耿介不苟取與見人有不善必面斥之引誘後進孳孳不倦髮逆之亂避居山中奇窮饑殍不繼夷如也賊退告人曰我輩一遇盤錯率多改行易操吾忍飢待時今幸免夫

馮尊五吳 塏丁丙佳傳

馮尊五字嘉瑞太學生甫冠而孤承遺訓端品嚴行姑母孀貧迎家侍養長姊貞烈奉以終身母年八十多病定省溫清侍湯藥不離身里中貧乏多借貸任其量力而償辛卯壬辰大歉鬻產以給歷艱苦無怨言里黨稱德門焉子二俱邑庠生

吳 塏字爽亭國學生幼聰穎兄培弟標先後入郡庠以家貧不

志

人物志三

十一

能成業儒棄而服賈非其志也性至孝少失恃事兩繼母逾於所生敦友于和順無間性尤慷慨遇戚族困乏力不能贍必稱貸以贖之中年家屢躓仍好施不倦鄉閭稱盛德焉子四長世銓詳見孝友次世鏜候選州同四長春羅田教諭

丁丙佳郡庠生仁靜長子性至孝父病時兩弟偕遊於外親侍湯藥朝夕不倦遇人危急則必竭力救護終身無德色鄉里賢之姪鹿鳴成進士多賴其教焉

劉正宰劉正鰲劉正志傳

劉正宰孝親恭兄析田產不爭多寡美惡凡族戚及粗相識有貧能讀者助修金考費以濟之或延至其家飲食皆取給焉事母依依如赤子寒溫暑涼無少間每遠歸凡母牀榻衣履皆一一檢點適體然後就寢卒年四十八歲

劉正鰲字鵠山嘉慶時人性剛方事父母甘旨無缺臨財一介不苟取雖屢空晏如也每與人稱素位而行章語當終身三復嘗授徒鄉間其族多貧館穀無所得督課勤嚴勿懈也鄉多巨族喜構訟鰲與其父老約戒子弟勿生事卒能盡釋嫌怨遇人有過理責切直皆自愧服生平嚴懇無戲言情容人無不敬憚者積學以布衣終以子傳曾貴贈中議大夫

劉正志母沒守墓十月雖嚴寒不畏事叔生養死葬爲其子若孫授室成家敬孀孀三買其子之田悉還之嘗捐田作義塚捐穀置義倉捐草場田畝作祭費子二次傳中乾隆戊子副榜

### 潘玉成傳

潘玉成字次甫性誠篤不苟言笑事親孝先意承志日置錢於篋恣取攜虛則潛益之待弟友愛兩爲娶婦鎖鑰付其管領不私一

志

人物志三

三

錢弟沒恤孤姪衣食婚嫁悉周至爲人謀極忠事有相持不下者捐囊以賑之有欠累者空乏不能償輒焚其券時有典夥因質訛其款浮於八十金玉成恐其事覆代償之亦不白於人易簣時召諸子曰吾生平無他守未與構一訟未負人一文未出一媒褻語三事堪自信耳卒年六十有五子炳烈邑庠生以佐胡文忠公戎幕保舉訓導歷加光祿寺署正監提舉銜

### 胡桂生傳

胡桂生原名秉成字懋修幼穎異讀書數行俱下爲文精而敏入郡庠食餼歲科試必居優等鄉試屢膺房薦道光壬辰年舉歲貢遂不復應試爲人和易坦直不立崖岸然審取舍慎然諾不隨人俯仰里人有以事質者出一言以決之皆帖服雖販夫里婦見必稱先生問安否教授里中門徒之盛爲江漢最晨起先自讀書數

十徧始卽席爲諸生講解根柢儒先不務新奇課文案頭常積三四十藝點竄塗改落筆如飛尤善啓發於單寒之士卻其修脯加意成全之其弟子先後入郡邑學者六十餘人道光乙酉湖北鄉試門下士獲雋者二人就試江南者亦中一人其子亦於是科得選拔科第相望仕有至監司者而相見則勸勉諄諄如執經問業時也論者謂耆德人師有太邱蘇湖之風卒年七十有七有貽穀堂文集藏於家子兆春道光乙酉拔貢乙未恩科舉人佐胡文忠公戎幕以勞績擢湖南同知加鹽運同銜孫大文十四歲入邑庠早逝大經邑增生同治丁卯舉人

### 黃觀型傳

黃觀型字宗山邑增貢生事母以孝聞地方公益事竭力維持光緒十年西湖水泛往來常有覆溺之患觀型募築土墊於葫蘆湖

志

人物志三

三

船戶得避風浪行旅便之十三年館漢鎮一日回家過馬家橋只一獨木人多病涉返漢募款而橋成年七十七終於家

### 李本忠傳

李本忠好義樂施以豪俠自命少游巫峽見牛口以東八斗蓮花諸灘怪石嶙峋錯列江心石梁數道橫亘水底夏時水漲流飛似箭漩渦掣如風高浪大渦挾盛怒以與石鬪東下巨艚掀舞不當一稿葉長年三者挽招竿呼呌力爭稍一不慎人船併裂冬日水淺懸崖千仞絳道峻極十里百折背百丈者猿攀蟻附高者凌雲霄俯者濡體足牽繩一斷舵折檣傾雖萬牛不能挽回而電逝颯飛卽父子亦無從相顧也本忠目擊而心傷之乃捐數萬金備器具轉巨石剷頽岸石之橫據江流者焚以炎火沃以食醢摧其剛堅化爲劫燼然後連檣東下百里一瞬復刊木開路以備絳道曲

者直之狹者廣之於是曲沱左右來往者權歌競發津鼓不停有司褒獎行路者皆拜德焉居平賑貧乏恤孤寡施棺木掩暴露善行不一端然皆故常之舉不更表之獨表其巨者

洪錫錄傳沛霖陳光裕傳

洪錫錄字紀堂職監生始繇皖涇來遷爲人謹厚飭樸自少至老如一日慎交遊重然諾於師儒尤加禮敬事涉地方文教捐貲贊成惟恐後道光乙巳郡守夏延請監修府學及晴川書院費約而工覈歲事例得獎叙堅不受年八十二卒初封奉直大夫晉封朝議大夫

傅沛霖字又舟邑庠生工舉業性樂善道光辛卯壬辰癸巳江河異漲災黎蝟集約監生傅斌傅敏胡贊書生員甘偉烈等捐立自新堂施茶藥衣錢以濟時疫道殣相望收葬倒斃一萬三千餘口

志

人物志三

西

家貧慎取與於公事尤一介不苟里人重之

陳光裕平日仗義疎財周恤窮困見人小有忿怒必助金以解其事上下十餘里咸稱其德卒年七十一歲

汪必相魯端聖劉述唐傳

汪必相字秉衡慷慨識大義嘉慶元年白賊擾鄖襄等郡相倡眾募鄉勇卽漢鎮防衛邑賴安堵孝感縣屬之三汊埠時亦設兵相以其地與漢接壤復捐米一千五百石往助五年秋鄰境大饑流民四集相首捐萬金賑濟全活無算七年又捐米二萬石佐房竹軍餉事聞奉旨加二品銜賞戴花翎

魯端聖字紹光國學生少失怙事母孝比長棄儒就貿勤儉持躬忠信待友家稍落周濟貧乏修寺觀造橋梁里人德之居恒率子弟以孝友和睦宗族有古人風年九旬容顏步履猶如少壯云

劉述唐字祁公康熙時人郡廩生父瑛光邑庠生有隱德事親孝養葬恪盡子道授徒所得館穀置祭田以贍宗族少時鄉有爲盜誣者述唐約紳耆爲之訴大憲怒唐挺身前曰此巨案枉殺數十無辜性命公忍乎大憲改容謝寃者得直教子義方子復拱皆知名後裔最盛

### 孫兆麟傳

孫兆麟字應三書儂其號也父廷士自休甯來漢陽遂附籍焉祖武東客安徽亳州學舍而卒時廷士生甫六月祖母許氏既葬夫亳州攜廷士入楚因家漢陽後許氏及廷士均以節孝及孝行荷旌表入祀忠孝節義祠兆麟少工文藝書法得名家矩矱試未售援例以同知候銓治家嚴肅宅心忠厚皆承其先訓率而行之事親孝廷士晚得末疾兆麟侍臥榻日夕不離衣不解帶者兩閱月

志

人物志三

五

既卒乃用遺命營葬大母墓側大父墓在亳州大母墓在江夏皆建祠合享兆麟繪同享圖冊徵鉅公名流題咏盈帙姊妹四所適家多中落賜恤備至甥男女來依者以養以教至於婚嫁皆身任之性尤慷慨重義輕財屢出重金爲戚友償逋其陷囹圄者百計營救所仗助拯援不下五十餘家道光辛卯水潦爲災捐緡二千貫設廠養糜粥爲之倡官吏遂相繼治賑全活者數十萬人邑考棚地於水捐資獨修至學額賓興貢院有事增廣修治咸極力襄贊傾囊以助他如修橋路施茶藥救生施棺各善舉按月協助未嘗稍愆年終度親友貧乏者先量予餽贈尤體恤寒儒加之禮敬生平交際一主謙退人人飲其和教子孫無習爭競延塾師執禮尤恭終始不衰家有藏書盈三萬卷白首披覽無間寒暑箸有同館詩賦題箋咸豐乙卯避兵長沙遭疾而卒子三次子謀道光丁



西拔貢由內閣中書以佐籌餼有勞擢候補知府加道銜

馮作新傳

馮作新字南亭國學生雖絕意進取而嗜學不倦日取宋五子及諸儒先書編摩諷誦往復不厭以是澤其躬行於其家閨門之內長幼肅然春秋時祭皆喪賓客之禮一衷諸古鄉人宗之尤以濟人利物爲亟道光己酉大水所至田廬漂沒道殣相望作新罄貲賑濟不足走書他所告諸好義之士醵金相佐全活無算以子禮藩貴誥封榮祿大夫當禮藩之在軍中也有黃陂金叟來謁謂禮藩曰子亦知子之所以至是乎皆汝父盛德之報也禮藩敬對曰謹受教因具述其父生平行事叟曰是皆人所知尙有人所不知者禮藩敬以請叟曰汝父之所不言某亦不敢言也堅叩之終祕而不語烏乎觀金叟所言亦可以知其隱德矣

志

人物志三

夫

張行璨陶正烈傳

張行璨字寶森性忠直好施與事親至孝咸豐乙卯粵賊踞漢口行璨鄉居有逃至其家者居則備饌餌歸則籌川資有山西客王姓者託妾尹氏於其家數年無音耗卒送其妾返咸甯母家擇配人尤難之

陶正烈邑之北鄉人性好施予咸豐乙卯漢鎮罹兵火人多避於鄉正烈無論識不識施茶煮粥以救飢渴日費數十千孜孜不倦其家非素封者展轉稱貸初無吝色子八人孫十餘人多列邑庠爲詩書門第人以爲好施之報云

宋國祥傳

弟國祐

宋國祥字履吉弟國祐字天吉兄弟承先業立質庫於漢上典中立規以先一年十一月朔起次年十月晦止凡布綿襖袴無論男

女大小限滿未經贖取者概不許鬻於市每歲冬寒令董事者率典眾計簿所存如數檢出運至廊下男者東女者西小者無論男女雜陳庭下自地而層累之以至於簷命廝役左右侍中設一席兄弟同坐啓門寒無衣者老少接踵入男舉東者與之女舉西者與之小兒舉庭下者與之暮無人至始閉門或三四日或五六日以衣盡而止行之數十年家中落不悔也厥後宋氏科第連綿皆自二人基之

### 宋勤于傳

宋勤于性慈厚與人無忤咸目爲仁人長者母黃病癱瘓臥床不起勤于率其婦侍奉數年無倦容而尤爲人所稱道者則焚券一事先是勤于病革時命其子取借券盡焚之人問其故曰子孫賢不需此不肖雖有此亦無濟後有徽人持五百金訪至其家勤于

志

人物志三

七

已卒二子堅卻不受曰吾先人既有焚券之舉吾受此不義且不孝徽人不得已涕泣持金去亦可謂善體父志者矣

### 宋仁達傳

宋仁達字穎之邑庠生道光壬子舉於鄉與兄仁立友愛仁達館鹺商吳氏供俸豐腆恒不食藏以將母吳知之命庖人備二分一以供師留其一備師奉母每夕兄弟侍坐母側忘歸私室母倦命之退始退人多笑二人鬚髮皓然如嬰兒之不能離母者蓋其時年均古稀矣仁立性豪爽御家人寬仁達性謹慤御家人嚴四世同居雍睦一堂無閒言有女兒適張其舅知廣西潯州府事仁立往探之值府試首場襄校者以落卷拭燭淚仁立取閱之甚佳告張列第一四覆皆冠軍蓋一老諸生也仁達之子長齡先一年中式報至親友來賀仁達背燈泣蓋不以子之捷爲樂而悲己之不遇

其志趣古執如此著有女子千字經一時傳鈔殆遍

### 熊建勳傳

熊建勳字星六少失怙棄儒業離粵匪之亂投筆從戎以勞績遞保藍翎直隸州晉運同加三品銜乙卯秋七月髮逆復犯漢建勳時佐胡文忠戎幕聞耗奔歸負其母一晝夜奔避蔡甸蓋其母素有目疾弗便於行也亂稍定漢鎮已成焦土遺民歸者一夕數驚乃集同志創爲團練按四坊分四大團井井有法又勸捐建修堡砦長十餘里形如弓式築四礮臺民賴以無恐同治丙寅漢沔罹水災流民以數萬計集漢上嗷嗷待哺爲之呈請地方官籌資設福祿壽喜四廠於大別山下復於漢口設仁義禮智四廠逐日煮粥濟食全活無算他如建善堂修義塚籌書院膏火以資儒林置文廟樂器以崇祀典種種善舉皆值漢口凋敝之餘絕不因掣肘而畏其難真篤行之士也年六十三以疾卒於家

### 李崇道傳

李崇道字立三郡庠生秋試僥得復失竟以諸生老年八十三歲卒生平清介殊俗然不爲蕪絕之行與人無豐嗇疏戚渾然莊以和九歲時其父督課嚴攜之黑山僧寺出恒丙夜歸必諷誦以俟境幽寂絕無怖念一身甯定實基於此既老精力弗衰喜時小花自娛盆養數十避陽就露往來遷移朝暮指指然間口占小詞不留草日飲酒二三鍾娛娛怡怡無幾微弗適者殆莊叟所謂天全者與以孫哲明貴貤封奉政大夫

### 李賢能傳

李賢能字玉書邑歲貢生素以醇謹稱勤學捷晤年十三試晴川閣賦爲學使杜瀚所奇賞拔置縣庠性至孝母劉疾亟變食不御

鹽鼓恒露跪中庭籲天乞身代累旬月未嘗伏枕居喪又淡食百日宗鄒咸嘆以爲難居家授徒數十年嘗言扶翼初學宜導其機勿使窒審其術勿使歧每校一藝爬核微密或稍中程獎語必過其望以故成就日眾邑有富賈持厚幣延課其子峻辭不往或病其拘則曰禮聞來學不聞往教豈瑣瑣計豐嗇哉生平廉潔眞摯與人无妄語自其子通籍後仍竭蹶授徒足跡不一踐官府邑人士相語端人碩德必首推之年七十五卒於家以子哲明貴初封奉政大夫晉贈通奉大夫

### 洪汝寬傳

洪汝寬字仁夫少聰穎鄉老宿儒決其必達旣以國子監生應試不售遂佐其父經商於漢皋家日以起於是推財愛眾以慷慨任俠聞孝感縣令某有廉名負累莫償汝寬與之善立出二千金資之未幾令卒往弔出券焚於柩前復厚遺其妻子返柩山東咸豐初元邑人士舉應孝廉方正科堅辭不受年屆七十有議製屏幃申祝者先期戒子孫曰古無生日爲壽之禮盍移酒食費以周鄉里乎年七十有六卒於家以子子彬貴誥封資政大夫

### 呂承鑫傳

呂承鑫字品三邑廩生事繼母至孝母病衣不解帶者累月凡床褥不潔必親拂拭之家素貧嘗耕漁以助給夜則篝燈誦讀不倦性嗜酒少飲輒醉醉則拈筆爲文淋漓滿紙若有神助居鄉犯而不校遠近咸稱長者凡鄉里有雀鼠之爭得其一言莫不渙然冰釋蓋其德量足以服人也粵逆之亂大兵雲集漢上大營將士往往拘鄉間疑似之人以邀賞蓋逆凡三次擾鄂不逞之徒四起莫辨其爲賊爲民承鑫於鄰近稔知其根底者每躬詣大營口講指

畫力辨其誣全活者數十至今鄉里猶稱道弗置焉

周 祐傳 子毓棠孫英燦

周 祐字篤生邑廩生性至孝母有夙疾厭聞鑼鼓聲每鄉人行  
儻必跪母前爲之掩耳聲息乃起壬子寇難偕兄妹奉母避鄉間  
授徒餬口晏如也亂平始返漢仍以授徒爲業學者爭負笈來凡  
執贄門下者不逾時而所造輒進其采芹食餼登賢書者不一而  
足生平爲文長於散體序跋及古近體詩而於帖括尤致意曰崇  
時尚也自應試後受知於省中各大憲日照丁公嘗於課卷詩中  
依韻和之鍾臺雷公屢稱爲入室弟子然未嘗一面干謁其廉潔  
自守如此郡邑有晴川鳳山兩書院歷任府縣皆委祐經理性和  
易平時無疾言劇色然每晤對長官爲地方陳利病則又侃侃直  
陳旁觀或慮其觸忌則曰行止之權操之官吾知而不言是欺人

志

人物志二

三

實以自欺也年七十有五以疾卒於里第長子毓棠邑庠生自分  
治後邑中創建文廟推廣小學皆毓棠經理以底於成可謂善繼  
父志者民國八年卒於里第孫英燦任俠尚義由漢陽府中學改  
習法文奉交通部充京漢鐵路駐站調查民國六年駐鄆城時  
有老婦攜子女各一到車站哭甚哀問之則以年荒以二十千錢  
賣其子女轉瞬開車卽長離燦詢之詳立出二十千並加息付老  
婦贖子女回復予十千俾其子小貿營生婦問姓名亦不告之民  
國八年八月歸送其伯父毓棠之喪感寒熱疾而逝年僅三十五  
同人均悼惜之

王道榮傳

王道榮字幼雨邑庠生正直有威重素孚鄉望粵賊犯漢勢熾甚  
使人受以重大僞職道榮陽諾之卽夕闔家潛竄賊怒焚其居購

捕甚急其父衰老爲賊所得道榮將以身代而父已罵賊死矣匍匐潛出葬父益自匿及官文恭駐師邑境乃出獻殺賊計多奇中官公欲延入幕以母老辭嘗謂人忘順逆由於見理不明遂專以道義教鄉人合堡數百戶終其世無賭場無烟室無少年子弟大茶酒肆人無顯爲悖逆皆一人化導之力也年八十九卒

### 呂自遠傳

呂自遠世居邑之丹水池咸豐間粵匪肇亂滋擾幾遍天下我楚據長江中游爲必爭之地省垣凡三陷附近居民多罹荼毒爾時統兵大帥如都質夫將軍多禮堂都護等凡有徵調皆檄自遠從事自遠率鄉人竭力供役始終無倦大帥甚嘉之屢欲給以頂戴輒力辭不受每語人曰吾非喜事也夫欲克金陵必自湖北始省垣一日不復則賊未易平吾屬之身家性命亦未可保況力役之

志

人物志三

三

征庶人尤當承命得賊速滅吾屬受賜多矣敢貪爲一己之功乎其明大義甘恬退有如此

### 李長齡傳

李長齡字松亭邑太學生家世習正一教長齡慷慨孝友不屑舊業當粵逆竄漢時其仲弟某爲賊虜長齡沿途呼號至漢鎮大碼頭河下得之跪船頭泣求賊感動給果食護照遣之卒挈仲弟歸有妹適陳氏陳某不善治生累長齡達二千餘緡母病革時目視陳而口不能言長齡跪請曰母之不瞑目者得勿爲陳妹借券乎卽檢書對母焚之母含笑逝乙酉年終大雪拾遺物於紹興會館之途折視乾泰線號之卽兌券也計八百金卽叩門還之次年丙戌其子大乾大坤同補弟子員人以爲還金之報云

### 鄧卓先傳

鄧卓先字福亭邑庠生性孝友其父國珍雅好儒術卓先仰體親心窮年孜孜以冀上達每以屢困棘闈不得博堂上歡爲憾其兄青雲經商豫省頻年跋涉家日益饒卓先以己享其逸兄任其勞每持之泣下年五十餘以疾卒至今後昆猶遵其遺範鄉里咸稱爲孝友傳家云

陳 圓傳

陳 圓字玉峯上庠生樂善好施漢陽之敦化漢口之樂善兩堂因賞絀幾於不振賴圓助得繼續興起宣統元年湖北大饑瑞制軍發官米平糶委圓董其事竣獎五品頂戴辛亥之役地方無賴輩乘間肆劫掠圓創辦商團力圖保衛商民德之共推爲清和保安會會長民國元年稟設清和初等學校及簡易識字夜塾使鄉里子弟俱得受學前總統黎題贈仁者之勇匾額三年八月以疾卒於家送殯之日白衣冠塞塗人爭豔羨之

志

人物志三

三

壽民

劉鈺光年九十三歲

劉述唐年九十六歲

林光閔年九十五歲

周方駿年九十四歲

曾餘芳年九十六歲

蕭明周現年九十四歲

蕭樂正現年九十三歲

蕭光松年九十九歲

王德詮年九十二歲

黃士林年九十三歲

韓家瑚年九十二歲

傅 午邑庠生積學能文刊有版築山房十藝行世樂善好施漢鎮奠安自新等堂皆賴午力成立焉妻劉氏亦慈善年八十時重拜花燭年九十二卒

呂桂遠年九十一歲

李善達年九十一歲

歐陽炳邑庠生民國七年重游泮水年九十二歲

易發祥年九十二歲

羅全發年九十六歲

高哲濬邑庠生年九十歲

涂經堯現年九十歲

熊自豪年九十七歲

志

人物志三

三

何賡梅邑附貢生年九十歲

劉鍾毓年九十一歲

呂榮萬年九十二歲

馮詩蔭現年九十歲

方技

白敦信黃祚憲傳

白敦信字誠齋工詩畫精六書之學志潔行芳不求人知嘗於由義坊闢地爲園隨其基之高下爲小樓曲榭位置楚楚襄河故道當其前春日芳草蒙茸黃花滿目夏秋之交煙波浩渺釣艇漁帆可指而數也子玉世其家學亦工篆隸漢唐碑版皆手自摩勒分刊合度又善射能開六鈞弓

黃祚憲字汝南習舉子業不售去而學醫博綜岐黃家言好爲人



製方以藥餌施人概不受值病愈亦不任謝平生好施予積有贏餘卽散之於人日吾以濟其不足也年八十六卒鄉人之病而不能延醫者至今猶念之

### 常道性王彭澤傳

常道性字芝仙籍蕪湖遷漢上閱三世矣少英敏耽文史長工書畫晉唐宋元諸大家之法無不神領意造尤精賞鑑能歷指其瑕疵以定真贗作詩專寫性靈時稱其詩書畫爲三絕比之鄭虔云王彭澤字五柳嗜丹青善醫理懸壺漢口市巾貧者不索貲嘗東走邗江西走滇粵故人所贈遺囊中累千金歸召朋舊酣飲竟月不計生產貲罄仍寓蕭寺黃齋白粥與苦行頭陀同甘苦其豪如故箸有尺木堂詩集

### 葉志庠李序韓蔡

### 楨傳

志

人物志三

三

葉志庠字伯庚精容成大撓之術推步考驗窮極杪忽試欽天監算學第一補肄業生性耽寂靜恒兀坐一室手一編不窺戶牖於九章六筮心解神悟當其沈思雖雷霆當空不之聞泰山在前不之見也積藁數寸未及成書因是以瘵卒年甫二十有八

李序韓字原漢官橋舊家也善畫花鳥畫成張壁間踴立四旁遠近靜窺其偏反飛鳴之態身自作勢以曲摩之少不如意卽碎去性介潔畏見俗人片語不合輒作色而遁常有監司持金索畫力卻不應監司怒命役往拘潛匿古廟龕下三日不食終弗就晚年能書工作詩月燬季煉有唐人風年六十餘卒無子

蔡楨字聲菴世家子性淡泊不樂仕進少年見王概畫好之概遊楚執贄受學遂得其傳漢上有畫中三絕之目謂魯震人物李序韓花鳥及楨山水也年六十九卒無子

以上摘錄漢陽縣志

田卜祚張尙樸傳

田卜祚字介旃邑庠生積學能文著有嘯雪軒詩抄尤精蘇柳書法臨有懷蘇法帖與江夏曹國祚同詣京師考授中書時稱湖北二祚

張尙樸字素恬少聰穎喜讀書積學未遇研究岐黃術頗有得活人無算遇貧無力者輒解囊濟之年八十無病而卒著有醫學覺夢集淡定軒尺牘待刊

朱宏照傳

朱宏照字子干幼聰穎能文見擯於有司改習醫術博覽羣書聲名大振有藥材行某翁病膽黃醫無效宏照診之曰是不難攜甘草百斤來我家住百日即愈某翁如教命以甘草煎水沐浴皆用

志

人物志三

三

之且以代茶飲百日果愈人問之曰醫者意也是翁業藥材數十年百藥之氣中於膽惟甘草能解百藥毒投之故效豈有他哉年七十八卒於家以子才華貴誥贈朝議大夫

黃大文筮 鑑傳

黃大文字蔚堂素精醫學於疔黃等症尤有心得活人無算著有各方便覽三卷待刊

筮 鑑字庚垣清嘉道時人世居漢口小新碼頭品學俱優尤工醫術診不計貲遇奇貧並贈以藥活人無算著有庚垣遺草四種行世咸豐時燬於兵火

黃耀奎焦震福傳

黃耀奎字蘇淳郡廩生好讀書於經史詞章兵法地理莫不留心研究而於算學尤精漢上諸人多師事之著有東觀齋算學三卷

行世見賞當時子三人長明孝邑增生亦精算學曾充陽夏中等農工學堂管教員著有中等算術講義八卷課題雜存四卷待梓焦震福邑庠生精算術著有槍礮從新一卷行世年未四十卒

### 方昌瀛傳

方昌瀛號錦洲少習儒業中年棄而學醫名著江漢間昌瀛之學由其母郭太孺人所授孺人通文藝精醫術苦節撫孤年八十餘卒以年逾三十不在旌例乃以其術授子卒成名昌瀛之爲醫也與病家約有病重而赤貧不能就醫者往診之不取費並戒輿人亦不取分文輿人退有後言一日輿人母病昌瀛徒步往輿人堅請乘輿昌瀛徐曰恐汝不願耳輿人乃太感悟其盛德服人類如此年六十三卒著有寄寰生筆記藏於家

流寓

志

人物志三

三

### 黃 均范 錯吳邦治傳

黃 均字穀原吳縣人山水蒼秀得宋元人法尤長窠石淡遠軼塵詩詞書法亦饒雅潔薄宦楚鄂性情疏散後贅於漢口周氏頗得隨寓而安之趣

范 錯字白舫烏程人性耽吟咏工詞曲廣交遊著有漢口叢談六卷

吳邦治字永康號鶴關歙邑人僑寓漢口與段寒香彭念堂稱漢陽三老好學多藝性頗耿介居有鸞飛樓自作小記甚佳

### 李必春范至渥黃承增傳

李必春字耀明江都人質遷於漢好善樂施予鎮易火貧居小戶延燒輒數千百家必春爲置蓆片按戶予之久行不倦子天佑守南昌迎養於郡必春恐去後事寢鳩同人預捐貲買貯於寶林菴

名曰廣庇會遇災則給領缺仍補之定約而去合數十年相沿無替鎮人畫像於寺壁戶祝焉

范至渥歛之獅塘人家素封援例授州司馬職後中落不屑依人生活常隻身往來鄖襄間販鮮鷺果以自給詩文書畫棊棋而外善樂演劇刺繡雕塑無不能膂力近千觔手技能卻五六十人客漢口時其友爲怨家所逼矛挺交舉蓮寶負友揭樓瓦飛身直下冲突重圍而出無少傷嘉慶初卒於沙市

黃承壇字心盦歛人偉貌修髯交游甚廣工作詩詞文思斐然好客遊所至公卿倒屣爭相延致爲江湖上客三留漢口與江漢人士爲文酒會將有終焉之志著漢口漫志得二十三卷未竣而卒

以上摘錄漢陽縣志

黃定源傳

志

人物志三

三

黃定源字玉泉孝感人僑寓漢上三世以質遷起家殆百年於茲矣定源幼失怙賴母氏賢教之成立性慷慨好施其創設普善善堂也在清光緒初載捐金數千爲諸善士倡先後購置蔡家巷興隆街江家垸等處房屋以垂永久其他興辦義塾購買義地施構送藥恤孤助賑諸善舉無不踴躍從事年五十一卒鎮人猶樂道之子五均能繼父業

劉璘傳子選青

劉璘字斌廷江夏人僑寓漢上凡本鎮公益事靡不爭先提倡如築城堡辦團練修江岸平治街道及一切善舉惟璘言是聽同光之際漢上俗稱於字上加一老字示尊崇也每有興作咸曰非劉老斌不可已而集事人遂羣呼爲老斌云

劉選青璘之第三子也光緒庚寅進士授湖南糧儲道丁父憂歸

仍寓漢上漢口商業日繁盛選青創設商務總會至今賴之光緒廿年本鎮攤民與警察衝突聚集數千人擣燬公署幾釀大變上游震怒必欲窮治幾興大獄選青以一身斡旋其間卒相安無事服闋留辦本鎮銀行以疾卒出殯日攤民數千人各執香設奠盈衢塞巷亦足見輿情感激之真摯矣

### 余能培傳

余能培字福田皖之休甯人父士炯以賢遷來鄂咸同之際軍餉支絀士炯協助萬金事載湖北通志能培嗣父業爲前商會總董凡商務進行及籌款事宜以得同意爲標準辛卯年南皮張文襄督楚創設兩湖書院需款孔急能培指撥數萬金因得蕙事積稼塢馬頭當河溜屢築屢潰能培悉心擘畫先墜煤塊繼以堅石工程鞏固至今賴之戊戌漢鎮大火延燒數萬戶能培家業盡付一

志

人物志三

天

炬不違自謀首先籌款賑卹舉辦團防使地方人民兩有裨益年六十一卒子繩鑄本邑庠生隨侍在漢復推爲商會總董可謂善繼父志者

### 任應富傳

任應富字潤庭江夏人僑居漢口幼貧苦助兄勤儉起家事兄如父兄沒待寡嫂孤姪敬愛周至性樂施與族里賴以存活者眾其扶持後進周濟寒素情意纏綿餽遺必恭使受之者無慚容同治甲子捻匪陷黃陂避亂來漢者風餐露宿沿街滿巷應富糾合同志在白布街適中之地設粥廠以賑饑民全活數萬一日途遇孤身少婦狀甚委頓勢將生婉命人扶至家呼家人善爲照料母子得慶生全亂定訪其家屬厚贖去其爲人所不肯爲類如此年六十餘病革時命家人將手墓屬易全卷納諸棺中以殮子鳳池

優廩生孫某某皆有聲庠序

王明文傳

王明文字琴甫皖之太平人父以工藝游漢上因家焉明文生於漢八歲就外傳聰穎異常兒人爭以大器目之年十五念父母劬瘁不忍以修脯增累力請學買遂徒手致萬金性慷慨雖以貧廢學喜與士大夫論郡國利病國家安危以不在其位無所設施則窮年矻矻以提倡公益爲己任念教育爲強國之本乃出貲於漢鎮創辦明文第一半日學校又鑒於辛亥之劫知地方設備不可緩卽盡力於保安會被舉爲各團聯合會正會長歲丙辰因帝制滇黔軍興武漢震動急創議於漢口設紅十字分會並設婦孺救濟部若干處凡以備兵事保人民者靡不具旋黨人聚於漢舉託足租界居民大恐乃委曲調停措貲解散一塵不驚皆明文力也

志

人物志三

无

當駐荆第一師自主時荆宜間日有戰事明文率救護隊馳抵荆沙掩骼療傷全活萬人出貲解散逃軍收槍械二百數十枝荆人至今稱之民國八年八月患咯血遽卒年僅四十有七以功屢蒙獎至二等嘉禾章

方外

李道士正德時住武當山唯嘅麥麩人呼麩子言吉凶多奇中嘉靖間荆永定王禮聘至蘄州問長生訣對曰殿下修身齊家長生訣也賜金帛不受辭歸至漢口臥舟中忽亡去其後王以事干宗正條例幾失國思道士言改悔前非卒稱賢王

漢陽縣志

僧寂光廣陵人博通象數尤精梵綱西遊於楚至漢口之生生林說誠一替僧俗會者千餘人江漢所未睹也去之沔陽結廣長社以居明末避兵入廬山遂示寂云

同上

仙爹姓名不可攷順治初僑居漢口由義坊言未來事多奇驗一日忽言此處當火急持盃水周行十餘家數日後果火前後灰燼獨所行處得無恙孝廉解乾濬子以痘殤瘞尼庵側尋復活里人陳姓收養之孝廉不知也每以無子爲憂仙爹嘗慰之曰汝子已長成矣初以爲誕康熙己酉乾濬遇小兒於途疑其貌類己子物色根究得其詳遂聞於官斷歸乾濬時人作絳紅袍傳奇紀其事於是仙爹之名益著人爭供給之卒葬大別山腰表曰仙爹云同上僧二白字東白本儒家龔氏子也七八歲時披剃於城西蘭若初不知書後忽頓悟凡五燈三乘之奧悉能洞澈駐錫江夏靈湖寺久之仍歸漢鎮圓寂晚歲善詩歌有栲栳前後集傳於世同上李扞枝不知何許人康熙間乞食漢口一飽外盡飯飢者賈翁某覺其異頻呼而餉之割門外舍與棲止李旦游都市夕歸宿有年

志

人物志三

三

矣鄰有孝子母病篤醫藥無效或謂李非常人盍求之孝子晨潔衣冠跪請李所李臥不顧孝子請益力李笑曰君真癡矣哉乞人奚能爲顧君念良摯宜爲計越三日岳陽樓有烹牛脯者取以啖母可也孝子以岳州隔千里難三日至再請焉李怒曰事急求吾而不用吾命曾有爲人子而憚勞若是哉擊以杖而逐之孝子迫母疾姑買舟挂颿風迅如矢三日竟抵岳陽樓下登岸物色適二丐踞地共食窺之牛脯也喜極乞其餘者不與奪而走丐追焉孝子以母疾思肉告丐曰爾其詭我哉旣曰爾且將去但囑李扞枝毋多饒舌也孝子聞而驚問扞枝何如人丐忽不見比歸出肉療母頓瘥往謝李已病越數日死矣賈翁憐而瘞之後十餘年有客從蜀來以書達謝兼致雙履啓緘乃扞枝名而履則翁子婦向施爲扞枝殮物始識爲仙其死也恐爲所覺故幻走云

江紹蓮聞見問言按李

拘枝前漢陽縣志方外門作李奧幾所載亦與此畧同  
拘枝與奧幾聲近故不免傳聞異辭其爲一人無疑

錫山冶坊有名王仙人者愛畜珍禽奇獸羣呼之曰仙人乾隆己酉六月余與仙遇於漢口見其寓中養一小鹿甚馴架上有白鸚鵡能言天子萬年吉祥如意等語自言嘗得一小獼猴高不過六七寸與老母雞同宿猴索食雞啄庭中蟲蟻哺之猴不顧猴亦將所食果栗與雞久之竟成母子猴每夜宿雞必以兩翼覆護習爲常也

錢泳履園叢話

僧戒顯曰漢口有僧號宏戒專化人放生一日遇屠者肩環一犬僧苦勸買放堅執不允乃云子與此犬殆夙世冤業吾不能救解也合掌作禮而退是日屠人宰犬手舉下鍋忽沸水濺心肉爛七日洞穿而死漢口人皆感動遂釀金建放生庵焉余往來漢上時寓於此

因果錄 按庵址相傳爲今縣署

志

人物志三

三

陳孝子江西人不知其名日嘗著麻衣往來江漢間但肩一畫像云其母形所到處卽卜卦伺其母之喜怒哀則留不則去飲食笑啼皆在焉尤與漢上李太常宗魯善謂有夙因館於其家嘗大書完養厚植四字贈之萬歷中告李曰吾嘗解去已而返嘆曰大道之難言如此遂瞑目後七日李使遇之於劉家橋以扇書七言絕句謝太常始知其尸解也

漢陽縣志

傅和尚名法印柏泉人也幼業箍桶初生時卽茹素年三十在漢口甘露寺蓄髮住持旋披削赴柏泉睡虎山廣王廟爲僧願有道行同治季年被舉爲甘露寺方丈能以大悲神咒療疾祛邪人有丐和尚醫治和尚爲誦大悲咒數遍病若失或有妖魔爲祟延和尚至則不待厭勝而邪立屏其尤不可解者寺中香火偶寂和尚卽手敲木魚口中不知作何語禮佛者遂相繼踵至至其起居飲食



亦與人殊每食僅飯一盂而不計盃之大小身被破衲一襲赤足草履無論寒暑皆然人因呼爲赤足和尚光緒八年以方丈付其徒徙居本鎮安定巷魯班閣逾十載遂示寂火化後得小姪兒於骨燼中時年已六十餘歲云

仁智和尚字慧蓮者本柏泉周氏子初名椿年幼卽爲僧於家祠之右騎龍庵中庵居僧眾飲食均與俗同周獨不苟葷血持戒律唯謹無冬無夏每聞鷄鳴卽起盥漱跪誦經懺必至天曙乃止晝則田間作苦荷鋤戴笠與諸僧同不數年間買牛雇傭增置田園十餘石和尚雖居寺廟無異農家周有母兄亦爲僧最無賴里人以其赤鬚也故恒名之曰紅毛鄉耆宿嘗笑謂周曰君昆仲旣屬同氣又俱爲僧胡兩人異趣若此周但合掌報謝曰阿彌陀無一語置辨也比圓寂時謂其徒果清及所知曰我生平雖無高行

志

人物志三

三

唯自知甚悉今猶童軀也死後火我當有舍利子七枚幸爲建一石塔歛燼骨葬之勿我違也已而皆如其言

祁源利應城人禪名聖聰字光圓駐漢口九蓮庵能以符水治人病所言歷年漢口未來諸災異每多奇中如光緒癸未三月二十八日兵厄已丑大水暨戊戌八月十六大火等事皆先作隱語以警人人恒仙之又有因其跡類風顛而呼爲祁風子者

僧體海字惟清孝昌李氏子也性敏喜讀同治丁卯披削於漢川千佛寺頗有道行能持金剛準提諸咒每虔誦數徧卽有金甲神護之光緒初元赴鎮江途遇二賊奪惟清衣單去同伴僧懇惟清云少坐片時卻再理會忽見二賊立惟清前惟清開目笑曰汝意遂矣反來胡爲賊答奪單前行時倏見丈六金身手持鐵杵至前逼還大師故物惟乞貸死收錄俾自懺悔惟清遂以爲徒數日至

金山寺老僧甚器之命主齋堂一日方坐香時炎熇灼膚惟清冥想間而明簾忽自捲起風入涼生眾異之老僧曰惟清作怪矣簾卽自下庚辰返楚駐甘露寺寺僧有圓寂者體堅硬不可屈伸惟清至僧前作偈有任汝身是鐵難過幾時刻云云僧卽綿軟跌坐是年購漢鎮仁里巷中路地十餘方結茅於此名鹿野苑後改爲圓照寺者也日惟焚香趺坐不爲人饒鉢誦經亦不出苑募化有過訪者與論難經史高妙無並聽者折馭旋又續起禪堂居僧甚夥嗣訪廣善禪師於燕京居龍泉寺一時親王大臣聞而造訪並願皈依一日見慈禧皇太后問對稱旨賜以貢珠己丑南旋養痾漢陽湘鄉賓館已就痊矣七月二十四日忽謂眾曰爲吾沐浴寂後須令端坐龕中七日怛化再入塔倘違吾言不祥眾云惟清身強善飯何遽云死妄之或曰賢者每不可測遂問後事惟清偈

志

人物志三

三

曰老僧今年五十五一拳打破虛空鼓倒騎木馬上須彌半夜三更日當午說畢更衣趺坐逝其徒因德恪遵所囑時當三伏屍經七日不腐非生有異稟者而能然哉

迎祥和尙邑人也居本鎮之三元殿口不談禪而頗諳禪理精歧黃業凡有造門求醫者不問貧富一診之診卽立愈且步行而前不乘輿不受謝雖未嘗懸壺自售而凡屬後湖篷戶罔不躬診予藥終身如此不以爲煩活人無算暇輒以琴碁自娛門弟子從而受業者頗不乏人光緒丁亥冬示寂時年已六十餘矣後南皮張文襄公由粵移節鄂垣命戈什持刺來請蓋文襄在粵卽耳迎祥善奕之名故特召之絕不意迎祥離塵已餘二載戈什乃悵然而返卽此已可想見其名動公卿云

吳栢菴煉士本黃陂籍生長應城縣性聰穎喜讀有宿慧遂於老

子常斥以丹經注老子者爲非詆之甚力尤通經義所著有論語章句詩經雙聲疊韻解歷住武漢諸名觀所在睨視儕輩恒與之落落難合也寄寓砂觜青雲寺三載於茲閉戶讀書不與流俗爲伍後憩漢陽玄妙觀無疾端逝以上據採訪補

右人物類區十二門都爲三卷初議以編纂事屬余余自維謏劣難勝其任且去取之間動易招尤爰商之總纂呂君余崑任攷古編纂則呂君自任之卷中新緝諸傳皆呂君手筆潔淨謹嚴馬班遺意較舊志諸作不啻霄壤閱者當自能辨之匪余之阿所好也第余攷古之餘所不能無疑者蓋夏口之名稱由來久矣三國六朝時蚤爲南北共爭之地顧自秦漢以後明清以前史冊所載未見有一人焉貫夏口籍者此何故也且非獨夏口爲然凡夏口舊與合同之漢陽沔郡

志

人物志三

三

守所同轄之黃孝川沔莫不皆然豈天之降材優於他地而獨靳於吾邑吾郡耶抑豈吾郡邑之山川獨劣不足以孕毓異人故數千年無一傑出者耶是不然蓋吾郡各邑於古時率隸他境且未有今茲之名三代以上無可攷矣漢以後郡屬江夏邑稱安陸或沙羨六朝以降郡稱安陸梁安魏安或郢州司州鄂州復州而邑則石陽沙陽灑陽沌陽曲陵汝南最後曰漢陽紛紛改革難更僕數生其地者卽畧有所表見史官載筆亦但以江夏安陸等名標之不暇記其瑣瑣改革之稱此吾邑吾郡所以明清以前數千年絕無一人見諸史冊也十室之邑必有忠信謂吾邑吾郡數千年來絕無一人生於其地豈理也哉雖然吾邑前此而未嘗有人也吾不能不爲吾邑羞吾邑前此而未嘗有人也吾又不能不爲吾邑

幸何則天地之生材盛則必竭鬱則必伸此一定之理也豐鎬豐沛之地昔繼續產數聖人或同時產無數豪傑以震耀寰宇後此能更然焉否乎汝南淮南漢末爲人文淵藪至今猶有其餘風否乎此所謂盛極而衰者也吾邑吾郡自三代秦漢以下未有聞人此天地機緘未啟留以有待者也至有明滿清之際始稍稍有一二魁梧長者名挂史籍此吾邑吾郡人材之見端也山川靈秀之氣前此未嘗宣洩則後此之孕毓者必較他地而更盛滿清中葉衡湘之間英賢輩出同建殊勳垂名竹帛前此所未有也此卽其地人文鬱極而伸之明驗也故余於攷古之餘統前後之事理熟籌之而不禁於吾邑之人材有厚望焉民國九年嘉平月望日舒可卷虞笙甫敬跋